

叢桂草堂醫草

袁 焯 著



科技衛生出版社

達於醫學。立論平允。學術精湛。而感慨淋漓。保存國粹之盛心。躍然紙上。可謂先得我心者矣。頃郵示其所著叢桂草堂醫草。屬爲之序。瀏覽一通。見其辨症剴切。用方工穩。每述一病。原原本本。剖析無遺。洵足開學者之智慧。昔周學海氏有云。宋後醫書。惟案最好看。不似注釋古書之多穿鑿也。每部醫案中。必有一生最得力處。潛心研究。最能吸取衆家之所長。余按醫案一門。當推喻氏寓意草一書爲冠。蓋其案雖僅六十二條。而反覆推論。務闡明其審症用藥之所以然。較之諸家醫案。但泛言某病用某藥而愈者。甚相懸殊。前清四庫全書提要贊其極有發明。足資開悟。近代名醫如張石頑葉香巖顧松園徐靈胎尤在涇俞東扶吳鞠通王孟英林珮琴等。皆折衷其診病之法。默收治療之功。各發表于醫案之內。今袁君此書。卽仿喻氏體例而先議病。後議藥。悉遵喻氏法程。且其中有學宋人及金元諸家者。有學明人及清之張葉徐魏吳王諸家者。亦有運用經方及自出新意者。洵能萃衆家之長而神明變化者矣。宜乎批郢導窾。而恢恢乎游刃有餘也。嗟乎。今之醫風爾然。頹敝極矣。出版之書。除一二譯本而外。幾如鳳毛麟角。而入主出奴。於今爲烈。滔滔天下。伊于胡底矣。安得全國醫家。皆如君者起而振此墜緒也。序君之書。蓋不禁百感橫集已。

乙卯六月廿八日越醫何肖巖廉臣書于紹城臥龍山麓之宣化坊

自序

予家自先伯父昌齡公肆力於醫。而家君繼之。迄於今蓋四十年矣。猶憶十歲時。家君遘熱病。神識昏瞢。醫藥罔效。會先伯父自江南歸。投以三黃石膏湯。匝旬而起。又憶十二歲時。家弟濟生病中暑。壯熱譫語。面赤煩渴。時家君遠出未歸。延郡中某老醫治之。手甫按脉。即大聲告曰。此兒之病。危在夜半。恐不治。翌日家君自外歸。命剖西瓜汁與飲。一汗而解。未嘗不歎醫藥之關繫如是其重。而專門名家之罕覩爲可憾也。十六歲後。先伯父以積勞病逝。家君又屢患肺病。欬嗽咯血。呻吟牀蓐。家庭之憂患日多。而予習醫之志。因是益堅。遂發家中藏書。朝夕玩誦。家君又時爲講解。每治難病。必撮其大要。舉以訓示。凡診察之奧窔。用藥之精微。與夫鑑別死生。暨寒熱攻補先後之次序。皆瞭如指掌。老人淳淳如蒙師之訓學童。寒暑靡間。樂此不疲。數年以後。于醫學始稍窺門徑。於是益蒐求舊籍。廣購新書。凡坊間罕見孤行之本。以及管趙諸氏所譯之西醫書。均羅而置諸几案間。參觀互證。久之遂別有會心。乃稍稍爲人醫治。丁未戊申兩年。前清兩淮鹽運使司趙都轉。與兩江總督端制軍。先後考試醫學。友人陳君瑞辰等相約觀光。謬獲最優等證書。嗣僑寓京口。遂以醫問世。四方人士。不以予爲固陋。競來延診。由是益有所考鏡。既自幸。復自愧也。嘗觀吾國醫學之歷史。其學術精深之士。得力于社會箇人之傳習者爲多。而政府提倡之力較少焉。非在上者不知提倡也。人材之出。本于山川靈秀。況醫屬專門科學。非學問閱歷兼到。未易得其神髓。故吾國醫書。皆以私家之著作爲優。今雖世界交通。政治學術多效法歐西。醫學一科亦採用西法。顧吾以爲中華乃文明舊邦。

先聖先賢所遺傳之醫學。自有其真精神在。決非他人之說所得而搖撼之。今而後欲求吾國醫學之發達。仍必賴私家之纂述以相爲輔助。予不敏。竊嘗有志於此。顧以茲事體大。尙須有待。去年十月。家弟濟生書來。囑將平時治驗方案。勒爲一書。以供研究。人事倥傯。未遑議及。今夏濟生復以爲言。而知交中亦有借鈔者。爰擇要編次。不分門類。題曰叢桂草堂醫草。蓋仿盧氏之芷園臆草。與喻氏之寓意草云。雖區區一得。未足方此二家。而十年經驗。或可爲醫林之借鏡歟。

歲在甲寅立冬前一日江都袁焯桂生氏識于京口寓次

叢桂草堂醫草

卷 一

鎮郡陶駿聲君令閩。腫脹嘔吐。纏延月餘。先是胎前足腫。產後腫益甚。欬嗽嘔吐。經此間諸名醫治之。疊進舟車丸。五皮飲。栝蒌薤白白酒湯。及八珍湯等弗效。且面目肢體悉腫。腹脹如鼓。欬喘不得臥。嘔吐痰水。輒盈盈碗。吐後亦能飲食。診其脉弦滑而有胃氣。言語亦甚清晰。初用小半夏湯加乾薑、五味子。及厚朴半夏甘草人蔘湯。枳朮湯等。無大效。且嘔吐大發。其時有人薦他醫治之。亦無效。陶君復延予治。詢得其情。則從前延諸名醫時。亦時發時止。或吐或不吐。但每覺胸膈悶塞。則知病將復發。必吐出痰水數碗。然後始覺寬暢。近日又覺悶塞異常。呼吸幾不能通。今雖吐後。猶嫌悶塞。欬嗽不得臥。予沉思久之。恍然曰。此肺中氣管爲痰飲閉塞不得通也。氣管之所以閉塞者。緣腹脹溺少。胃中及膈膜間均爲痰飲充塞之地。膈中痰飲充塞。則溢於肺中氣管。肺中氣管亦充塞。則滿而悶塞不通。呼吸不利。內既充滿。則激而上出而爲嘔吐。以故盈盈盈碗。皆痰涎水沫。痰水既出。則膈膜脾胃等處皆鬆。故知饑能食。待數日後痰水聚多。又復作矣。是則此病之真諦也。治法以驅痰飲爲要。而驅肺中氣管之飲爲尤要。苦思半晌。爲立一方。用三子養親湯。合二陳湯。加麝香五釐和服。以白芥子能橫開肺中之飲。麝香香竄。能通氣管及膈膜間之閉塞。且能止吐。明日復診。述昨藥服後。覺藥性走竄不已。上竄至咽。下竄至小腹。胸部尤覺竄走。隨竄隨嘔。吐出痰涎甚多。半夜未能安枕。而胸悶覺寬。呼吸便利。嘔吐亦止。蓋氣管之閉塞通矣。遂以原

方去麝香。接服三劑。而胸次大舒。欬嗽亦減。仍以原方加冬蟲夏草、北沙蔴、生薑、紅棗。又三劑而浮腫亦消。欬嗽大定。但腹脹如故。堅滿不舒。乃停煎劑。每日單服禹餘糧丸二次。每服三錢。忌鹽醬等物。五日後脹漸消。十日後脹消及半。而精神疲憊。自覺心內及臟腑空虛。蓋飲滯消而氣血虛也。令以前丸減半服。並以蔴、朮、歸、芍、山藥、茯苓等煎劑相間服之。不十日而脹全消。病竟愈。聞者莫不歎服。迄今六年。病未復發。且已經孕育矣。

庚戌四月廣安祥糖棧。袁堯寬君患溫病。初由章綬卿君診治。服藥數劑。病未大減。嗣章君往江北放賑。轉薦予治。壯熱譫語。見人則笑。口渴溲赤。每日祇能進薄粥湯少許。舌苔黃薄而乾燥無津。體胖脈息滑數。右部尤甚。蓋溫病也。熱邪蘊伏日久。蓄之久而發之暴。故病情危重若是。治法當以解熱爲主。而佐以豁痰潤燥。方用三黃石膏湯。合小陷胸湯。去麻黃、豆豉、半夏。加貝母、連翹、青蒿、梨汁。接服二日。熱未大退。至第三劑後。乃作戰汗而解。但餘熱未清。復以前方去石膏、芩、連、栝蘂。加苡仁、滑石、蘆根、花粉、沙蔴等清化餘邪。數劑而癒。凡溫病之解多從戰汗。劉河間吳又可發之於前。葉天士王九峯暢之於後。證以予所經歷。洵精確不易之學說也。蓋前人於此。皆從經驗中得來。惟必俟服藥多劑。始能奏功。而作汗之時。必先戰慄。其狀可駭。醫家當此。何可無定識定力耶。

金峙生君令堂。年近五旬。發熱身痛。舌苔白膩。溲熱胸悶脈滑。予初以三仁湯加連翹、山梔。接服兩劑。熱愈甚。口渴心煩。舌苔轉燥。脈亦轉數。蓋伏邪病熱。邪蘊伏甚重。遂易方。以黃芩、栝蘂、地骨皮、青蒿各三錢。連翹、知母各四錢。木通一錢。銀朮胡二錢。蘆根、茅根、鮮生地各一兩。梨汁一酒鍾和服。一劑熱少平。二劑後。病人忽戰慄惡寒。震動牀帳。蓋欲作戰汗也。病家誤會。謂藥之誤。議延他醫。幸其弟陶駿聲君來告。速

予往救。予謂此戰汗也。病退之機。不可妄動。及予至其家。則戰慄已止。身出大汗。而脉靜身涼。神氣亦甚安靜。但覺疲倦而已。隨用薄粥湯與飲。以扶胃氣。並以沙蔞、麥冬、百合、苡仁、石斛、花粉、甘草、茯苓等調養兩日而痊。

庚戌四月。史漢泉君患溫病。昏沉不語。面垢目赤。鼻孔如煙煤。壯熱燦手。汗濺濺然。舌苔黑燥。手臂搖搦。兩手脉數疾。溲赤。問不能言幾日矣。曰。昨猶譫語。今始不能言。然大聲喚之。猶瞠目視人。問近日大便通否。曰。始病曾泄瀉。今不大便已三日矣。問服何藥。則取前醫之方示予。蓋皆不出銀翹散。三仁湯。增液湯之範圍。予謂此熱病未用清藥。陽明熱極胃家實之病也。非下不可。乃與調胃承氣湯。合三黃石膏湯。去麻黃、豆豉。加犀角、萸仁。接服兩劑。竟未得下。惟矢氣極臭。溲色若血。神識較清。而身熱舌黑如故。原方去元明粉、大黃。加鮮生地。並令恣飲梨汁、萊菔汁。於是熱減神清。黑苔漸退。脉息亦較平。時吐粘痰。目睛轉黃。遂改用小陷胸湯加蘆根、茅根、青蒿、菖蒲、竹茹、貝母、冬瓜仁、木通等芳香清冽之品。以分消膈中痰熱。接服四劑。胸部頸項間遍出白瘡。如水晶珠。腹部腿畔亦發白瘡。於是身熱全清。知饑進粥。但精神疲弱耳。復以西洋蔞、麥冬、石斛、苡仁、貝母、竹茹、枇杷葉等調養數日。始解黑燥屎數次。當時兩進大黃。而不下者。蓋其戚友中有知醫者。潛將大黃減去一錢。每劑祇用二錢。故但有解毒之功。而無攻下之力。而奏效亦較緩也。然究勝於粗工之濫用硝黃。而債事者矣。

姚某子十五歲。三月間由學校歸家。自覺惡寒欲睡。旋即發熱頭痛。身痛譫語。不能識人。按其脉滑數。溲赤。當以梔豉湯銀翹散出入爲方。下午四時復診。神昏譫語如故。身熱自汗濺濺然不止。面赤口渴欲飲水。脉息滑而不數。舌苔薄膩。不黃不燥。因思傷寒論云。陽明病、發熱汗多者急下之。而面赤神

昏。又皆當下之症。遂改用小承氣湯。大黃三錢、厚朴五分、枳殼二錢。加黃芩、連翹、知母各二錢。服後解大便兩次。神清安睡。汗止熱解。自能起坐。知饑欲食。其家以爲病愈。不復延診。越三日。復發熱有汗。口渴。脈滑數。與白虎合小陷胸湯。石膏用三錢。服後熱退神清。惟欬嗽痰中帶血而已。復與瀉白散加黃芩、知母、茅根等二劑全愈。

張兆魁君室人。年約三旬。體質瘦小。發熱譫語。口渴心煩。欲食冷物。胸悶腹熱。舌苔黃膩不燥。兩脈俱數。與小陷胸湯加芫胡、黃芩。不效。燒熱益甚。遂改用涼膈散。大黃、元明粉各用三錢。服後得下兩次。並得戰汗而熱全退。惟精神萎弱。懶於言動。復以黨蔘、麥冬、枸杞子、乾地黃、黃芪、炙甘草等補養氣血之藥。兩劑而起居飲食如常矣。

鴻泰糖棧陳祝山。年約三旬。今年七月患伏暑病。延某醫診治。服藥四五日。不效。壯熱頭疼。胸悶咽喉作燥。口渴舌絳苔薄焦燥無津。大便七八日不通。溲赤脈數。蓋暑熱蘊伏腸胃熱結之病。治法當先通大便。以解腸胃之焚。乃以生大黃二錢。元明粉三錢。枳殼、黃芩、麥冬、天花粉各二錢。甘草五分。此藥服後。得大便兩次。熱全退。頭痛亦輕。舌苔轉白膩。脈緩不數。小便仍紅。知饑欲食。乃易方以連翹、苡仁、佩蘭、花粉、沙蔞、貝母等以解餘邪。越兩日。又復發熱口渴胸悶。是餘邪欲出也。以小陷胸湯合小芫胡湯。去人蔘、薑、棗。加連翹、青蒿。接服兩劑。得汗而安。大凡應用硝黃之病。決非他藥所能代。若畏而不用。必致纏延誤事。但須辨認真切。用之有方。不可顛倒孟浪耳。

丁未夏月。予遊吳門。適該處霍亂流行。死亡接踵。有神仙廟旁紙店孀婦。亦染此病。吐瀉交作。醫投五苓散。玉樞丹。附子理中湯。左金丸等法。入口卽吐。已延三日。視其目陷形消。四肢逆冷。心煩不能安臥。口渴欲飲冷飲。舌紅根有膩苔。頭有

微汗。兩脉皆數。重按無神。蓋暑病也。與黃連香薷飲。去厚朴。加苡仁、蠶沙、半夏、石斛、沙蔞、黃柏、枇杷葉。服後吐止神安。手足轉溫。二劑利減。能進粥湯。嗣以前方去黃柏、蠶沙。減輕川連。利止。惟心悸腰痠頭暈。精神疲憊。不能起坐。兩脉細小。此病去而氣血虛也。以西洋蔞、白朮、石斛、山藥、杜仲、棗仁、茯神、當歸、甘草、紅棗等。調補三日而痊。

蘇州閭門外營盤場。有程姓少年。亦病霍亂。吐瀉不已。煩躁畏熱。身無寸縷。而猶畏熱異常。欲臥冷地。四肢悉冷。胸腹部亦均不熱。口渴欲食西瓜。小便短赤。頭項微汗。腳腓痠攣。脉息寸關俱數。舌苔黃燥無津。此暑熱內伏。熱深厥深。內真熱而外假寒之病也。乃以白虎湯合黃連香薷飲。去厚朴、粳米。加麥冬、苡仁、石斛。陰陽水煎。一服吐止。再劑利亦止。而煩渴亦大定矣。惟肢體尚冷。囑以稀粥與飲。安睡一夜。體溫遂復常度。于是但以飲食調養。不勞他藥而瘳。

徐某年約三旬。秋間陡患腹痛吐利。發熱口渴。煩躁不安。舌苔黃膩。脉息滑數。蓋暑溼蘊伏中焦。腸胃中有宿滯也。與黃連香薷飲合平胃散。一服吐利止。身熱退。接服一劑。知饑欲食矣。大凡黃連石膏之病。其舌苔必黃膩。或黃燥。其小便亦必紅赤。若小便清長舌光無苔。則黃連二藥皆爲禁劑。蓋舌質之光否。可覘胃臟之虛實也。

朱姓子八歲。秋間病霍亂吐瀉。手足悉冷。口渴欲飲水。目陷形消。不食不饑。舌苔黃膩。脉息小數。用薑汁炒川連三分、法半夏一錢、扁豆三錢、苡仁三錢、木香五分、北沙蔞二錢。服後吐瀉止。手足溫。舌苔亦退。能進稀粥。但口渴殊甚。遂改用麥冬、天花粉各一錢五分。北沙蔞二錢。白朮一錢。苡仁、扁豆各三錢。兩劑痊。

張姓婦年四十餘。先於四月間病心悸怔忡。頭眩發熱。予以天王補心丹加青蒿、地骨等藥治愈矣。及至夏間。陡患腹痛

上衝於心。嘔吐清水。下利紅白。痛甚則手足俱冷。汗出神疲。按其脉沉澀而小。望其色則面白唇淡。蓋陽虛中寒之病。殆由乘涼飲冷所致。問之。果連日臥竹牀乘涼。且稍食西瓜等物也。與附子理中湯加吳茱萸、桂枝、白芍、砂仁。一服痛稍緩。兩劑痛始平。手足溫。遂以原方去附子。減輕薑、萸。自是利止食進。復以歸芍六君子湯。調治數日而痊。

詹雲溪先生幼子。甫生數月。夏間因服荷葉露、銀花露過多。下利手冷。面色皓白。口吐涎沫。其家以爲難活矣。予用理中湯加丁香。減小其劑。一服利止。而涎沫亦不吐矣。二服神氣充。手轉溫。復以五味異功散。培養胃氣而安。今已十歲。爲小學校之學生矣。

張星五大令 紹興桐城人 宰崑山時。其如君年四十餘。患血崩症。經醫治愈。自是遂不能寐。精神疲憊。飲食不多。延予治之。左脉細小。心脉尤弱。臍左有動氣勃勃。甚則上衝。心悸多汗。頸胸間嘗覺筋掣。蓋血舍空虛。筋無血養。而虛陽不能斂納也。乃與阿膠鷄子黃湯合三甲復脉湯。加女貞子、枸杞子、棗仁、茯神、柏子仁等。接服五劑。諸症稍退。夜間亦稍能寐。遂接服至十五劑。病大退。飲食亦較多矣。嗣以原方加生地、熟地。製成膏劑。常服全瘳。

庚戌三月。葉姓婦臥病垂危。其子來邀予診。行色惶惶。口稱已經某醫診治數日。稱爲不治。並求速往。視之果神色大衰。時出冷汗。手冷額冷。面色萎黃。心悸頭暈。精神不支。脉息小弱。蓋陽氣大虛。亡陽在即之危候也。遂以四逆加入葠湯。再加黃芪、白朮、棗仁、白芍、紅棗等。薑、附各用一錢五分。葠、芪、朮均用三錢。急煎與服。旋即汗止手溫。神氣亦轉。能進米粥。原方去附子。稍輕其劑。接服三日全安。

朱姓婦因病小產。旋即手冷惡寒。自汗不止。胸悶不欲食。脉息澀滑而小。舌苔薄白。此產後陽虛。而兼有痰溼阻滯也。用

黃芪建中湯去飴糖。加橘皮、半夏。一劑汗收手暖。二劑全愈。

壬寅臘月。家慈因侍先外祖母病。及經營喪葬事。悲勞過度。復冒風雪。遂患關節疼痛。不能起於牀。服千金獨活寄生湯數劑。痛止。亦稍稍能起坐矣。越兩日晨間。忽大汗淋漓。目直視。手冷。家人見之。惶駭不已。以爲不祥之徵也。家君入視後。取吉林人淺半枝。紅棗約十數枚。急火煎服。纔下咽而神色卽覺寧靖。汗亦漸收。復以理中湯加黃芪。接服兩日而安。距今已十三年。未嘗患病。此亦予家得力於醫之一事也。

方兆珍君令媳。年二十餘。臥病經旬。服藥多劑。而煩躁譫語。卒不能平。延予治之。見躁擾不安。妄言罵詈。欲食冷物。手冷。脈息沉弱。口雖渴而不能飲。唇雖焦而舌則潤澤。且舌色不紅。面色黃淡。身不發熱。予謂此虛寒病也。殆寒涼發散太過乎。檢閱前方。果皆芩、連、羌活、桔蘖、海石之類。病家間既係寒病。何以煩躁欲食冷物。而譫語不能寐也。予應之曰。寒病有常有變。凡惡寒手冷。下利清穀。口中和而不渴者。此其常也。若躁擾不安。欲臥冷地。欲食冷物。則其變也。何謂之變。以其寒病而反現熱象也。其所以現此熱象者。因陽氣虛寒。龍雷之火浮越于外。古人所謂陰盛格陽。又曰內真寒而外假熱之病也。治宜引火歸元。否則涼藥入口則立斃矣。乃與四逆湯。乾薑、附子各二錢。加肉桂八分。黨蔘、白朮、熟地、棗仁、茯神各三錢。煎成冷服。果躁擾漸寧。接服一劑。能安睡矣。自是神安能食。不復罵詈。復以歸芍六君子湯。調補數日而痊。

王姓老婦。年約六旬。偶病感冒。醫者以發散藥與之。次日遂發狂奔走。欲脫去上下衣服。欲臥冷地。其子惶駭。延予診之。予視其面色黃淡。手足俱冷。脈息沉弱。是陽虛欲脫也。急以四逆湯加黨蔘、熟地、肉桂。兩劑而安。嗣以人蔘養榮湯。調補數日乃痊。

壬子正月。利記糖棧駱達三君。患感冒病。頭痛惡寒。飲食

無味。脉息小滑。予用葱豉湯加荊芥、紫蘇、半夏、橘皮等。詎此藥服後。忽喘息不能臥。頭腦中覺熱氣上升。小腹左偏作痛。嘔吐痰水。畏寒手指厥冷。脉息沉弱。蓋陽虛受寒之病。得發散而陽氣益虛也。其頭腦中覺熱氣上升者。腦力素衰。寒氣逼龍雷之火上越也。其喘息不能臥者。肺腎兩虛不能納氣也。其腹痛嘔吐痰水者。寒氣內擾氣血不能通調也。其畏寒手指作冷者。虛寒病之本相也。乃與理中湯合六君子湯。加肉桂、白芍、五味子。服後喘吐俱平。腹痛亦止。能進稀粥半碗。但仍覺畏寒手冷。益信爲陽虛矣。仍用前方去茯苓、橘皮。加熟地。服後諸症悉退。病家自以爲病愈。遂不服藥。越數日。復惡寒頭痛手冷。時或手足發熱。精神疲倦。不思飲食。舌苔少而色白。小便黃。脉仍沉小。乃以理中湯。合小建中湯去飴糖。加半夏。服後諸症少退。但時覺虛火上升。則頭痛大作。手足亦覺發熱。而其身則殊不熱。遂師李東垣法。用潞黨、白朮各二錢。肉桂五分。升麻、芎藭、川芎各一錢。炙甘草八分。茯苓三錢。半夏一錢五分。加生薑、紅棗同煎。覆盂而頭痛止。手足亦不發熱。接服一劑而安。凡老年之病屬虛者多。非偏於陽虛。即偏於陰虛。而亦有陰陽兩虛者。醫家於此。尤宜加意焉。

盧谷山年近六旬。患泄瀉。由夏炳如先生介紹邀診。脉息小弱。兩手俱冷。精神疲倦。此脾胃氣虛。陽氣衰弱之病。乃用理中湯加山藥、木香。接服兩劑。精神較好。能進飲食。原方加肉桂四分。枸杞子二錢。又服二劑。手稍轉溫。泄瀉已止。但頭眩殊甚。原方去薑、桂。加熟地。接服三日。頭眩較減。而手仍冷。復於原方中加鹿角膠、黃芪。服兩劑後。精神殊覺爽健。惟手終不暖。蓋高年真火已衰。非旦夕所能奏功。乃囑購鹿茸半具。研末。每日服五釐。用高麗蔘三錢煎湯和服。盧君遂託友在滬購辦蔘茸。如法服之。半月後返閩。今年春間。盧君復來鎮江。言鹿茸甚有效。現在精神甚好。而手亦轉溫。今擔任賴大有

皮絲煙號經理云云。大凡積虛之病。皆須悠久成功。而尤必藉血肉有情之品。始易奏效。鹿性純陽。能補人身陽氣。茸生於首。兼能補腦。故有此特效也。

乙巳二月。季姓婦。欬喘倚息不得臥。惡寒發熱。頭疼身痛。胸悶不舒。心痛徹背。脉沉而滑。舌苔白膩。此風寒痰飲內外搏結。肺氣不得下降而成肺脹也。乃用小青龍湯合栝蒌薤白湯。麻黃、細辛、各四分。乾薑、五味子各五分。栝蒌、薤白各三錢。甘草五分。餘藥各一錢五分。服後得汗。而寒熱喘息俱平。惟身痛欬嗽未已。易方。以桂枝湯和營衛。加乾薑、五味子各五分。細辛三分以治欬。一劑效。因貧不復延診。遂漸愈。

吳某年十五歲。欬嗽音啞。自春徂秋。迄未能愈。欬而無痰。飲食能進。不熱不渴。脉如平人。與三拗湯加乾薑、五味子、半夏。服三劑後。欬減聲音如常。每次麻黃祇用三分。至第四劑則減至二分。後以六君子湯調補三日而瘳。

劉某病延兩月。欬嗽吐痰甚臭。身熱口渴。手足心熱。舌紅無苔。右脉滑數。此肺臟伏熱勢將成癰也。與黃芩、貝母、玉竹、薤仁、桑葉、知母、枇杷葉等作煎劑。加梨汁和服。一劑熱輕嗽減。三劑全愈。

鮑姓子三歲。發熱數日。欬吐臭痰。大便完穀不化。捫其額熱熾手。舌乾苔少。口渴脉數。乃肺臟受熱也。擬方用黃芩、馬兜鈴、地骨皮、知母、貝母、栝蒌、苡仁、桑葉、甘草、枇杷葉。一劑知。二劑已。

孫姓婦年四十餘。素有肺病。欬嗽痰中帶血。頭暈心悸。徹夜不寐。精神疲憊。心內覺熱。飲食不多。脉息細弱。此平日勞神太過。血液衰耗。肺病日久。將成肺癆也。擬方用百合、棗仁、茯神、柏子仁各三錢。沙蔞、麥冬、地黃各二錢。阿膠一錢五分。服後血止能寐。但汗多氣喘。原方去百合。加黃芪五分。枸杞子二錢。浮麥三錢。胡桃肉三錢。接服兩劑。汗收喘定。但尚有欬

嗽而已。原方去黃芪。加地骨皮、貝母、枇杷葉。服三劑後。欬大減。精神亦健。能乘輿出門。遂改用集靈膏。令其常服而痊。

劉錫九君欬嗽多日。音啞。起居如常。體胖。脈息緩滑。舌有膩苔。蓋痰飲病也。與二陳湯加白芥子六分。白朮二錢。苡仁三錢。三服而瘳。

周珊甫君夫人。年逾五旬。素患肺病。欬嗽哮喘。痰聲如拽鋸。呼吸幾不能通。予視其體胖神強。兩手脈滑有神。蓋富裕之家。奉養太過。肥甘油膩。蘊釀成痰。致肺氣管枝發炎也。擬方用杏仁泥、白前、桔梗各一錢五分。薄荷五分。橘紅八分。貝母、苡仁各三錢。茯苓二錢。甘草五分。枇杷葉一片。作煎劑。一服呼吸大暢。哮喘亦定。接服三劑全愈。

孫姓女。甫週歲。欬嗽多日。初延西醫某治之無大效。後延中醫某治之亦無效。因來求診。予見其精神疲憊。面色淡白。舌紅無苔。滿舌俱破。有汗不熱。乃虛症也。用生脈散加百合、元蔞、扁豆等作煎劑。初次僅用沙蔞。接服兩劑。欬嗽大減。神氣亦佳。惟夜間汗多。原方加黃芪一錢。浮小麥三錢。改用黨蔞。又兩劑。欬嗽亦減。舌破亦愈。其舌上亦并未用吹藥也。

龍耀南君夫人。欬嗽多日。時發寒熱。舌光無苔。脈息濡緩。與生脈散加青蒿、黃芩、苡仁、百合、貝母、枇杷葉。接服兩劑。寒熱退。欬嗽亦減。惟目光不足。視物昏花。原方去青蒿、黃芩、苡仁。加乾地黃、女貞子。三劑而痊。

卷 二

癸丑冬月。裕大昌木行伊君夫人。年二十六歲。懷孕三月。驟然腹痛下血。既痛且脹。痛甚則頭出冷汗。手冷鼻冷。胸悶嘔吐。前後陰皆阻脹不堪。左手脉伏不現。右脉弱小。面色淡黃白而無光采。舌色淡無苔。此氣血虛寒之象。殆由勞力受寒使然。蓋中下焦陽氣不足。腹部受寒。則血脉流行阻滯而爲痛脹。胃臟受寒則消化停阻而嘔吐。子宮之血管破裂則下血。左手脉伏者。血爲寒凝。營衛之功用失常度也。右脉弱小者。氣血虛寒之本相也。前後陰與腹部阻脹拒按者。血爲寒凝。陽氣不能運行也。額冷鼻冷手冷面色無神者。亦皆虛寒之本色也。其病殆與傷寒直中陰經無異。特孕婦之病。又兼漏下。與常人異耳。問之。果因送其伯父之殯。夜間操麻雀牌未眠。黎明乘輿登山。飽受風寒。歸家卽病。擬方以膠艾湯合建中湯法。當歸、地黃各四錢。川芎二錢。阿膠三錢。以止血安胎。肉桂八分。製附子一錢五分。桂枝二錢。炒白芍三錢。以回陽止痛。而散寒邪。砂仁一錢。木香一錢五分。以溫胃消滯。而通阻脹。黨蔘三錢。紅棗三枚。生薑三片。以扶元氣而和營衛。作煎劑服。明日復診。痛脹均大退。嘔吐亦止。能對予發言。亦能進粥。左脉亦現。面色亦較有生氣。但下血未止。心內常覺空虛。乃以原方去木香、砂仁、桂枝、川芎。并稍減桂、附。改地黃爲熟地。而當歸亦減用二錢。加枸杞子三錢。茴香二錢。接服三劑。飲食起居。略如平人矣。一月後。始強健。而胎則杳然。蓋下血時已隨波而墮矣。

金平卿君哲嗣。年八歲。體質素瘦。今年三月出痧。痧後又生泡瘡。至六月初旬。又病喉痧。發熱咽痛。初由西醫蔣某治之。用冷水浸毛巾罨頸項。又用水浴法。及服安知必林。與鹽剝

水漱喉等法。均無效。病勢益劇。其岳家童姓薦予治。時六月十五日也。身熱。咽喉兩旁上下皆潰爛腐穢。舌紅無苔。口渴。溲黃。脈息戛數。蓋陰液大虧。熱邪燔灼於上焦也。熱不難解。惟咽喉全部腐爛而陰液虧耗。斷非實症可比。危險已極。幸神不昏。呼吸不促。不煩躁。尙可挽救。擬方以增液湯爲主。鮮生地一兩。麥門冬、元蔞各三錢。加鮮石斛、金銀花、連翹各三錢。黃芩一錢。天花粉二錢。知母一錢。甘草六分。作煎劑服。外吹錫類散。先用淡鹽湯漱喉。漱後吹藥。金君自以體溫計置病人口中驗熱度。已有一百零五度之高。予謂體溫計雖能驗熱度之高下。然不能分虛實。萬不可泥以論病。若祇準體溫計所驗之熱度以定治法。則當用三黃白虎。然就脈象舌色而論。則不獨三黃白虎不可誤投。卽西藥中之退熱劑。亦非所宜。否則危亡立見。噬臍無及矣。金君韙之。遂以予方煎服焉。

十六日復診。四肢不熱。身熱亦輕。舌色紅艷而光。毫無苔垢。大便通利。溲色黃濁。言語多。口不渴。徹夜不寐。喉爛如故。脈息虛數。原方去黃芩、花粉、知母、鮮生地。加西洋蔞一錢五分。棗仁、硃拌茯神各三錢。乾地黃五錢。用百合一枚煎湯代水煎藥。

十七日復診。舌上紅色轉淡。夜間能睡一二時。譫語亦減。咽喉上部腐爛較退。惟下部及兩側等處。仍然腐爛。精神疲憊。脈息虛細無神。是氣血大虛之候也。急宜培補。擬方以大補元煎合增液湯法。西洋蔞二錢。炒熟地炭三錢。乾地黃四錢。懷山藥三錢。硃染茯神四錢。麥門冬、元蔞、石斛各二錢。人中黃四分。吹藥仍用錫類散。日吹數次。

十八日復診。夜寐甚安。譫語亦止。稍能進粥湯。喉爛減退大半。脈息仍細弱無神。仍用原方。熟地加至四錢。又加蓮子三錢。女貞子三錢。

十九日復診。喉爛全退。用毛筆蘸水拭之。腐物隨筆而出。

全部皆現好肉。不比前數日之黏靱難拭矣。脉息亦較有神。而現滑象。舌色仍淡無苔。小便清。能進薄粥。仍用原方。熟地減用三錢。去石斛。加扁豆三錢。

二十日復診。飲食較多。乃以原方減輕其劑。接服兩日。眠食俱安。但忽又發熱。或輕或重。而熱之時間又不一致。金君復以體溫計驗之。仍在一百零五度。及零三四度之間。甚以爲憂。予曰。無恐也。此氣血未能復原。營衛未能調和。而邪熱之內伏者。仍不免有餘蘊耳。且現在喉爛全愈。眠食俱安。種種生機。與七日以前之危險現狀。相去不啻天淵。乃以前方去熟地。酌加青蒿、佩蘭、苡仁、地骨皮等藥。接服兩劑。遍身發出白瘡。如水晶。如粟米。而熱遂退。飲食亦漸多。但仍不能起牀行立。囑以飲食培養。如鷄鴨湯、粥飯之類。儘量食之。自是遂不服藥。越數日。爲其祖母診病。此兒猶未能起牀。但飲食甚多。每日夜須食六七餐。至半月後。始稍能行動。一月後始能出臥室。可以想見其病之危。體之虛矣。當其未能出臥室之時。亦間有發熱便秘。面目浮腫諸現狀。皆未以藥治之。蓋此爲病後應有之現象。一俟氣血精神恢復原狀。則自痊矣。此病得痊。固由病家始終堅信。勞無掣肘之人。而夏君子兩贊助之力。亦足多焉。予用熟地時。病家不敢服。慮其補也。賴夏君爲之解說。蓋夏與金固舊交。而亦精於醫者也。

金平卿君令堂。年逾五旬。體素胖。今年六月。疽發背。先由西醫劉某醫治多日。潰爛甚深。而不能生長肌肉。遍身發生小瘰。形如豆大。其痛異常。手臂動搖。腿亦顫動。不能起坐。徹夜不寐。西醫見之卻走。稱爲不治之症。并斷其死期不能出一星期之外。金君聞之大恐。適予爲其公子治喉症。乃邀以診治。并云。聊盡人子之職分而已。其意蓋深以病勢之危。恐終不能起耳。予診其脉洪大不柔。左手寸部尤覺大硬。舌光赤無苔。亦無津液。蓋高年陰液大虧。孤陽獨熾。外症出膿後。津血益傷。加